



30 Julai 2021
30 July 2021
P.U. (A) 324

WARTA KERAJAAN PERSEKUTUAN

FEDERAL GOVERNMENT GAZETTE

ORDINAN DARURAT (KUASA-KUASA PERLU) (SARAWAK) 2021

EMERGENCY (ESSENTIAL POWERS) (SARAWAK) ORDINANCE 2021

DISIARKAN OLEH/
PUBLISHED BY
JABATAN PEGUAM NEGARA/
ATTORNEY GENERAL'S CHAMBERS

ORDINAN DARURAT (KUASA-KUASA PERLU) (SARAWAK) 2021

Suatu Ordinan yang dimasyhurkan oleh Yang di-Pertuan Agong menurut Fasal (2B) Perkara 150 Perlembagaan Persekutuan.

[2 Ogos 2021]

BAHAWASANYA disebabkan oleh suatu darurat besar sedang berlaku yang mengancam keselamatan, kehidupan ekonomi dan ketenteraman awam di dalam Persekutuan berikutan wabak penyakit berjangkit, iaitu Penyakit Koronavirus 2019 (COVID-19), dan untuk menghalang daripada terus merebaknya COVID-19 jika suatu pilihan raya umum ke Dewan Undangan Negeri bagi Negeri Sarawak (kemudian daripada ini disebut sebagai “Dewan Undangan Negeri”) diadakan, suatu Proklamasi Darurat (Sarawak) telah dikeluarkan oleh Yang di-Pertuan Agong di bawah Fasal (1) Perkara 150 Perlembagaan Persekutuan pada dua puluh sembilan hari bulan Julai, dua ribu dua puluh satu:

DAN BAHAWASANYA Yang di-Pertuan Agong berpuas hati bahawa tindakan serta-merta adalah dikehendaki untuk diambil bagi menggantung pilihan raya umum ke Dewan Undangan Negeri demi melindungi dan menjamin keselamatan, kehidupan ekonomi dan ketenteraman awam Negeri Sarawak dan bahagian lain Persekutuan:

MAKA ADALAH DENGAN INI DIMASYHURKAN SUATU ORDINAN oleh Yang di-Pertuan Agong menurut Fasal (2B) Perkara 150 Perlembagaan Persekutuan seperti yang berikut:

Tajuk ringkas dan permulaan kuat kuasa

1. (1) Ordinan ini bolehlah dinamakan **Ordinan Darurat (Kuasa-Kuasa Perlu) (Sarawak) 2021.**

(2) Ordinan ini mula berkuat kuasa pada 2 Ogos 2021.

Yang di-Pertuan Agong untuk berunding dengan Yang di-Pertua Negeri bagi Negeri Sarawak

2. (1) Yang di-Pertuan Agong hendaklah, dalam menentukan keberterusan kuat kuasa Proklamasi Darurat (Sarawak) yang dikeluarkan pada 29 Julai 2021, berunding dengan Yang di-Pertua Negeri bagi Negeri Sarawak.

(2) Walau apa pun subseksyen (1), kuat kuasa Proklamasi Darurat (Sarawak) itu boleh ditamatkan lebih awal oleh Yang di-Pertuan Agong setelah berunding dengan Yang di-Pertua Negeri bagi Negeri Sarawak.

Pembubaran dan pilihan raya Dewan Undangan Negeri

3. (1) Bagi tempoh darurat berkuat kuasa, peruntukan Fasal (3) Perkara 21 Perlembagaan Negeri Sarawak bahawa Dewan Undangan Negeri terbubar selepas lima tahun daripada mesyuarat pertamanya, tidak mempunyai kesan.

(2) Bagi mengelakkan keraguan, bagi tempoh darurat berkuat kuasa, Fasal (4) Perkara 21 Perlembagaan Negeri Sarawak hendaklah mempunyai kesan seolah-olah perkataan “dalam tempoh enam puluh hari dari tarikh ia bubar dan Dewan Undangan Negeri yang baharu hendaklah dipanggil bermesyuarat pada suatu tarikh yang tidak lewat daripada satu ratus dua puluh hari dari tarikh itu” telah dipotong.

(3) Dewan Undangan Negeri hendaklah terbubar pada tarikh Proklamasi Darurat (Sarawak) dibatalkan atau diumumkan.

(4) Bagi maksud mengadakan pilihan raya umum ke Dewan Undangan Negeri, Suruhanjaya Pilihan Raya hendaklah mengadakan pilihan raya umum dalam tempoh enam puluh hari dari tarikh Proklamasi Darurat (Sarawak) dibatalkan atau diumumkan.

Persidangan Dewan Undangan Negeri

4. Bagi tempoh darurat berkuat kuasa, peruntukan yang berhubungan dengan persidangan Dewan Undangan Negeri dalam Perlembagaan Negeri Sarawak tidak mempunyai kesan.

Saraan, faedah, dsb. ahli Dewan Undangan Negeri

5. Bagi tempoh darurat berkuat kuasa, ahli Dewan Undangan Negeri adalah hingga tarikh pembubaran berhak kepada saraan dan apa-apa elaun dan faedah lain yang kena dibayar kepada mereka di bawah mana-mana undang-undang bertulis.

Kuasa eksekutif

6. (1) Bagi tempoh darurat berkuat kuasa, Ketua Menteri dan Majlis Mesyuarat Kerajaan Negeri Sarawak yang wujud sebaik sebelum Proklamasi Darurat (Sarawak) dikeluarkan pada 29 Julai 2021 yang telah diberikan kuasa eksekutif hendaklah terus menjalankan kuasa eksekutif Negeri Sarawak dan mana-mana orang lain yang telah diberikan fungsi eksekutif oleh undang-undang hendaklah terus menjalankan fungsi itu.

(2) Bagi tempoh darurat berkuat kuasa, Ketua Menteri dan ahli Majlis Mesyuarat Kerajaan Negeri Sarawak adalah berhak kepada saraan dan apa-apa elaun dan faedah lain yang kena dibayar kepada mereka di bawah mana-mana undang-undang bertulis.

Kuasa untuk mengambil milikan sementara tanah, bangunan atau harta alih

7. (1) Walau apa pun apa-apa peruntukan Perlembagaan Persekutuan, Yang di-Pertuan Agong atau mana-mana orang yang diberi kuasa oleh Yang di-Pertuan Agong boleh mengambil milikan sementara mana-mana tanah, bangunan atau harta alih atau mana-mana bahagian tanah, bangunan atau harta alih dan boleh memberikan apa-apa arahan yang didapatinya perlu atau suai manfaat berkaitan dengan pengambilmilikan tanah, bangunan atau harta alih itu.

(2) Semasa mana-mana tanah, bangunan atau harta alih berada dalam milikan sementara Yang di-Pertuan Agong atau mana-mana orang yang diberi kuasa oleh Yang di-Pertuan Agong di bawah seksyen ini, tanah, bangunan atau harta alih itu boleh, walau apa pun apa-apa sekatan yang dikenakan ke atas penggunaannya, sama ada melalui mana-mana undang-undang bertulis atau surat cara lain atau selainnya, digunakan oleh, atau di bawah kuasa, Yang di-Pertuan Agong atau mana-mana orang yang diberi kuasa oleh Yang di-Pertuan Agong bagi maksud sedemikian, dan mengikut

apa-apa cara, yang difikirkan suai manfaat oleh Yang di-Pertuan Agong atau mana-mana orang yang diberi kuasa oleh Yang di-Pertuan Agong.

(3) Yang di-Pertuan Agong atau mana-mana orang yang diberi kuasa oleh Yang di-Pertuan Agong, setakat yang didapatinya perlu atau suai manfaat berkaitan dengan pengambilmilikan sementara atau penggunaan tanah, bangunan atau harta alih itu menurut subseksyen (2)—

- (a) boleh melakukan, atau memberi orang yang menggunakan tanah, bangunan atau harta alih itu kuasa untuk melakukan, berhubung dengan tanah, bangunan atau harta alih itu, apa-apa jua yang mana-mana orang yang mempunyai kepentingan mengenai tanah, bangunan atau harta alih itu berhak melakukannya menurut kuasa kepentingan itu; dan
- (b) boleh melalui perintah mengadakan peruntukan bagi melarang atau mengehadkan penggunaan hak lalu-lalang ke atas tanah atau bangunan itu, dan hak lain yang berhubungan dengannya yang dinikmati oleh mana-mana orang, sama ada menurut kepentingan mengenai tanah atau bangunan itu atau selainnya.

(4) Pemunya atau penghuni mana-mana tanah, bangunan atau harta alih hendaklah, jika diminta oleh atau bagi pihak Yang di-Pertuan Agong atau mana-mana orang yang diberi kuasa oleh Yang di-Pertuan Agong untuk berbuat demikian, memberikan kepada mana-mana pihak berkuasa atau orang yang dinyatakan dalam permintaan itu apa-apa maklumat yang berada dalam milikannya yang berhubungan dengan tanah, bangunan atau harta alih itu, yang merupakan maklumat yang boleh dengan semunasabahnya diminta daripadanya berkaitan dengan pelaksanaan seksyen ini, sebagaimana yang dinyatakan sedemikian.